



أميمة سلطان

رئيس قسم الثقافة
بجريدة اليوم المصري
وعضو عامل بالنقابة العامة
للعاملين بالصحافة والإعلام

قلم تالت

قلم أول كسر قلبي
قلم ثاني كسر روحي
وبين لتنين حاجات ماتت
عايزني إزاي أكون قادرة
وأتحمل قلم تالت؟!
ما صدقت السنين فاتت
على الجرح اللي عمره ما خف
كما التعبان قدرت تلف
على قلبي وتكسرني

ف أول مرّة جيت تجري
بدبلة وقلت حبّيتني
يا دوب كام شهر ولقيتني
وقعت ف قلب دوامة
خيانة وذل ومهانة
وبيها كسرتلي قلبي
أكيد ذنب الوفاء ذنبي
لكني قدرت أتعكز
وافارقك ضعف مش قوّة
مشيت بسند على الخطوّة
واكمل رحلتي وحدي
شهور فاتت على صمتي
وقلّة حيلتي وجراحي
ورغم الجرح كان صاحي
قدرت تعود وتخدعني
سامحتك برضو من قلبي

ف دي المرّة كسرت الروح
خيانتك زي باب مفتوح
على البحري بدون ترباس
ف سيبي لوحدني يا ابن الناس
وروح لطريقك الضلّمة
خلاص ضاعت حاجات منّا
وقصّتنا اللي مكتوبة
على ورق الحياة باشت
حاجات فعلا كثير ماتت
وصدّقني م انيش ح أقدر
أخش الفيلم من تاني
ولاح أقدر برغم الشوق
أشوف منك.. قلم تالت